


Il cudisch da cuschinar sin mia meisa-cuschina.

Meinsvart – da miezdi e la sera –
sfegliel jeu el cudisch da cuschinar.
Leu engartel jeu recepts grondius.
Ei dat tontas tratgas che lain dar giu
la liua a mi. Gia il patratg vidlunder
lai sentir l'odur el nas ed il gust sin
mia lieunga ed jeu patratgel con grondius che mia veta ei
(ni fuss....) cun quellas spisas deliciosas.



Gie, jeu concedel, denteren dat ei era paginas en miu
cudisch da cuschinar, nua ch'jeu sfegliel pli spert, perquei
ch'jeu sentel negin gust, gie magari schizun in disgust per
enqual tratga. Suenten in mument siarel lu puspei il
cudisch, schubregiel giu la bucca, s' imagineschel las
bunas spisas e selegrel da buca stuer lavar giu.

Pauc tec pli tard s'annunzia miu venter – el ha fom!

Jeu sesmarvegliel – jeu hai tuttina gest schau influenzer
mei da tut quellas tratgas gustusas el cudisch da
cuschinar e selegrau davart ils recepts ed ussa ei la
fom puspei presenta?

*„Suandei il plaid e buca seigies mo auditurs ch'engonan
sesezs.“ (Giachen 1, 22)*

La Bibla dapertut.....

La Bibla ei sco in cudisch da cuschinar. Leu sesanflan bellezia
historias. Grondius recepts per il reussir ella veta.

Denteren dat ei denton era recepts pli peters, pli amars.
Malgrad quei, igl ei adina il plaid da Diu che vul esser nutriment
per nosa veta.

La Bibla ei buca cheu mo per vegnir legida; per udir ses plaid.
Atgnamein vul la Bibla dar a nus curascha d'agir ussa, oz,
cheu ed el mund entir.

„Igl ei bi da nescher sco cristifideivel.

Igl ei bi da murir sco cristifideivel.

Denton

Tgei capeta enteifer quei temps?



Atras il tgau.....

Fetg jeu patratgs davart il plaid da Diu? (Schar ir atras il tgau
vul dir: D'ina ureglia anen e da l'otra anora). Decisiv ei
denton: Co ei miu dafar, co ei miu agir?

Tier il miedi....

Jeu mondel buca tier il miedi per sulettamein retscheiver ina
buna diagnosa, less denton buca vegnir medegaus. Jeu
mondel tier il miedi ch'el medegheschi mei, tenor sia diagnosa
cun ils medicaments adequats. Aschia stat ei era cul plaid da
Diu. Nus legin e nus tedlein el. Denton, sin tgei moda realisein
ni practicein nus il cuntegn?

Lein cattar ad agur la delicatezia el plaid da Diu.

Jeu giavischel a tuts in bien appetit!

Communicaziun per omisduas pleivs:

Seras da bibla – dedicadas a temas specifics

Dapi 7 onns porschan las pleivs da Falera, Laax e Flem-Trin mintga meins da cuminonza ina sera da bibla. Duront l'emprema fasa havein nus discuttau davart ils texts biblics ils quals ein vegni legi duront il survetsch divin dalla dumengia proxima. Avon 3 onns havein nus midau quei concept. Mintga sera da bibla era dedicata ad ina persuna biblica. Suenter quei temps lessan nus dar ina ulteriura nova fuorma a quellas sentupadas. Mintga sera biblica duei tractar temas specifics.

Nus lein s'occupar e discuttar da tematicas biblicas, religiusas e temas che pertuccan la baselgia. Per la selecziun dallas tematicas haveis Vus la pusseviltad d'influenzar quellas. Elegi in tema ch'ei per Vus d'impurtonza ed annunziei Vies giavisch tier gl'uffeci parochial. Las seras da bibla han liug alternativ ina gada el meins a Falera, Laax, Flem e Trin. Bugen envidein nus Vus all'emprema sera che ha liug mardis, ils 27 d'october 2009 allas 20.15h ella Sentupada a Flem. La participaziun a quellas seras ei individuala.

La corda da paternos – Cadeina d'oraziun mundiala

Las pedras dalla corda da paternos stattan en connex cun differents misteris dalla cardientscha che nus meditein duront recitar il rusari. Las pedras vegnan tenidas ensemen entras ina corda ni entras ina cadeina.

Jeu hai viu inagada ina corda da paternos tschentada sur in glob. L'explicaziun ei stada: Il paternies unescha e cumpeggia il mund entir. Buca per nuot vegn il meins d'october numnaus il meins dil s. rusari ed il meins dalla missiun mundiala. Missio, la missiun catolica internaziunala, sestenta per l'ulivaziun materiala e la solidaritad denter las baselgias localas e procura per il brat d'informaziun davart la cardientscha ed il viver denter ils cristians en tut il mund. Cheutras ei la Missio la pli gronda acziun solidaria dil mund. Milliuns da carstgauns ein uni en l'oraziun duront il meins dall'oraziun mundiala. En tuttas pleivs catolicas mundialas vegn quell'unfrenda recumandada per cheutras sustener ils confrars e las consoras en lur basegns.

Ord quei motiv lein s'unir cun gl'entir mund era ell'oraziun previda dil s. rusari duront il meins d'october.

Informaziuns per Laax

Communiun dils malsauns: Mesjamna, ils 21-10-09 **suentermiezdi**.

Graun – paun – parter ei il tema dalla devoziun per ils pigns e lur mummas en baselgia.

In cordial beinvegni per mesjamna, ils 21-10-09 allas 16.00h.

Gratulaziun:

Ils 30 d'october 2009 astga Frena Arpagaus festivar siu 95-avel natalezi. Nus gratulein cordialmein e giavischein tut il bien, buna sanadad ed in' emperneivla sera-sontga.

Perdanonza

Nus essan envidai da seradunar per festivar la nossa Perdanonza, quei vul dir: Nossa cuminonza cartenta ella pleiv, ch'ei dedicata a s. Gagl e s. Otmar.

Lein per quei selegrar ed engraziar per tutta benedicziun, satisfacziun e consolaziun che nus retschevein en quest liug da Diu ed era in da l'auter. Possi la Perdanonza svegliar en nus il desideri dad adina puspei vegnir ensemen e renovar nossa carezia e la relaziun cun Diu.

Informaziuns per Falera

Communiun dils malsauns: Gievgia, ils 01-10-09 **suentermiezdi**
Gievgia, ils 22-10-09 **suentermiezdi**

Graun – paun – parter ei il tema dalla devoziun per ils pigns e lur mummas en baselgia.

In cordial beinvegni per mardis, ils 20 d'october 2009 allas 16.00h.

Nozzas a s. Rumetg:

Ils 3 d'october 2009 festiveschan Martina Sgier e Tristan Imgrüth lur nozzas. Nus giavischein als nozzadurs ina fiasta sulegliva, cletg e ventira en lur veta matrimoniala.

FEGL PAROCHIAL PFARREIBLATT LAAX – FALERA

October / Oktober
2009



Uffeci parochial / Kath. Pfarramt

Via principala 68, 7031 Laax, Plevon: Sur Peter Aregger,
Tel. 081 921 41 12, E-mail: aregger.peter@bluewin.ch
Secretaria dallas pleivs: Natalia Gliott Tel. 079 283 45 80
E-mail: kath.kirche.laax@bluewin.ch
Adressa d'internet: www.pleiv-laax-falera.ch

Reformiertes Pfarramt Sagogn-Laax-Falera

Pfarrer Thorsten Minuth, Encarden 24, 7152 Sagogn.
Tel. 081 921 68 55, e-mail: minuth@kns.ch